

Morning Regional Dogri News Bulletin, 23rd July 2024

मार्निंग डोगरी न्यूज़ बुलेटिन, समें. 09-20 Hrs



Headlines

1. वित्त मंत्री निर्मला सीतारमण होर अज्ज लोकसभा च केन्द्रीय बजट पेश करगंन।
2. उपराज्यपाल मनोज सिन्हा होरें उच्च सतह् दी बैठक दरान स्वतंत्रता दिवस सरबंधी तैआरिणं दा जायजा लैता।
3. सरकारै आखेआ ऐ जे हाल दे ब'रें च बेरोजगारी दा दर च कमी दर्ज कीती गई ऐ।
4. रियासी दे डिप्टी कमीशनर विशेष पाल महाजन होरें शिव खोड़ी रनसू थाहर श्रावन महोत्सव दा उद्घाटन कीता।



Union Budget

खजाना मंत्री निर्मला सीतारमण होर अज्ज बडलै 11 बजे लोकसभा च केन्द्री बजट 2024–25 गी पेश करगंन। नरेन्द्र मोदी सरकार दे त्रीए कार्यकाल दा एह पैहला बजट ऐ। बजट पेश कीते जाने थमां पैहले संसद दी दौनें सभाएं च आर्थिक सर्वेक्षण 2023–24 पेश कीता गेआ हा। एह्दे च अर्थबवस्था दे प्रदर्शन बारे दस्सेआ दसाया गेआ। 2019 च खजाना मंत्री दे तौर पर औहदा संभालने मगरा निर्मला सीतारमण हुंदा एह लगातार 7मां बजट ऐ। बजट थमां पैहले आले सलाह–मशवरे च खजाना मंत्री होरें केई माहिरें, सलाहकारें, राई–बाई सरबंधी संगठनें, कारोबारी इदारे, राई–बाई अर्थ–शास्त्रिणं, शिक्षा, सेहत, बपार, रोजगार ते शैहरी क्षेत्रें दे माहिरें सनें केई मुत्तलका धड़ें कन्नै बैठकां कीतियां। निर्मला सीतारमण होर जम्मू कश्मीर लेई 2024–25 ब'रे दा बजट बी पेश करगंन। एह लगातार 5मीं बारी होग जिसलै जम्मू कश्मीर बारे संसद च बजट पेश कीता जाप'रदा ऐ की जे इत्थें अजे विधानसभा दा चुनां नेई होआ ऐ।



LG-Sinha

उपराज्यपाल मनोज सिन्हा होरें आजादी आले ध्याडे गी मनाने लेई तैआरिएं दा जायजा लैने लेई कल सिविल ते पुलस प्रशासन दे वरिष्ठ अधिकारिएं ते डिप्टी कमीशनरें कन्नै इक उच्च स्तरै दी बैठक दी प्रधानता कीती। उपराज्यपाल होर जिला प्रशासनें ते मुत्तलका मैहकमें गी निर्देश दित्ते जे समूलचे केन्द्र शासत प्रदेश च बगैर अड़चन ते रमानदारी कन्नै स्वतंत्रता दिवस दे प्रोग्राम लोआने लेई सब्बै इंतजाम कीते जान। उपराज्यपाल होरें पैहली अगस्त कोला लेइयै 14 अगस्त तोड़ी स्वच्छता पखवाड़े दा सरिस्ता करने दे बी निर्देश दित्ते। उनें सार्वजनिक थाहरें ते यादगारी स्मारकें पर “एक पेड़ शहीदों के नाम” 15 दिन दा इक अभियान चलाने दा मुत्तला मैहकमे गी निर्देश दित्ता। उनें स्वतंत्रता सैनानिएं, शहीदें ते गुमनाम नायकें दे मान सम्मान च लगने आले प्रोग्रामें ते गतिविधिएं च लोकें दी सरगर्म हिस्सेदारी लेई सहूलत देने लेई सब्बने घड़ें दे किट्ठे रलियै कम्म करने दे महत्त्वै पर जोर पाया।



Unemployment

सरकार नै आखेआ ऐ जे मुख्य च बेरोजगारी दर च हाल दे बरें च गिरावट आला रुक्ख दिक्खेआ जा'रदा ऐ। लोकसभा च इक लिखित सुआले दे परते च श्रम ते रोजगार राज्य मंत्री शोभा करंदलाजे होरें आखेआ जे सरबंधी हालिया रिपोर्ट मूजब 2020–21 च 15 बरे ते ओहदे थमां मती उमरी आले लोकें आस्तै अनुमानित बेरोजगारी दर 4.2 फीसद ही जिसलै जे एह 2022–23 च 3.2 फीसद रेई।



Economic Survey

आर्थिक सर्वेक्षण 2023–24 च माली बरे 2024–25 च सकल घरेलू उत्पाद यानि जीडीपी दी विकास दर 6.5 थमां 7 फीसदी तोड़ी दस्सी गई ऐ। खजाना मंत्री निर्मला सीतारमण हुंदे आस्सेआ पेश कीते गेदे आर्थिक सर्वेक्षण मूजब कुल संसारी आर्थिक तरक्की च जक्को-तक्की दे बावजूद मकामी क्षेत्रें 2023–24 च आर्थिक प्रगति गी समर्थन दित्ता ऐ। सेवा क्षेत्र नै भारत दी प्रगति च बड़ा मता योगदान दित्ता ऐ। सेवा क्षेत्र नै कुल अर्थबवस्था च 55 फीसदी दा योगदान दित्ता ऐ। मैंहगाई बारे भारतीय रिजर्व बैंक नै आखेआ ऐ जे माली बरे 2025 च मैंहगाई दर 4.5 ते 2026 बरे 4.1 फीसदी रौहने दी मेद ऐ।



NEET UG Case

सरकार नै आखेआ ऐ जे पिछले 7 बरे च मुख्य च पेपर लीक दा कोई मामला सामने नेई आया ऐ। ओह नीट-यूजी पेपर लीक मामले च किश बी नेई छपेला रदी ऐ। शिक्षा मंत्री धर्मेन्द्र प्रधान होरें लोकसभा च

प्रश्नकाल दौरान जिमनी सोआलै दा परता दिंदे होई आखेआ जे मुख्य च पेपर लीक दियां घटना आम होने दे विपक्षी दलें दे आरोपें गी खारज करदे होई उनें आखेआ जे मुख्य भरै च शड़ा इक मामला सामने आया ऐ। उनें आखेआ जे सीबीआई मामले दी जांच करा रदी ऐ। एहदे थमां पैहले कांग्रेस नेता राहुल गांधी होरें इस मामले गी पुट्टदे होई आरोप लाया हा जे मुख्य दी परीक्षा प्रणाली च बड़ी मती गंभीर समस्या ऐ।



Chief Secretary

मुख्य सचिव अटल डुल्लू होरें कल जम्मू कश्मीर दे बपार ते औद्योगिक संस्थाएं दे नुमायंदे कन्नै इक बैठक लाई। औद्योगिक ते बपार संस्थाएं गी पेश आवा करदे मसलें दा तैह समें दरान नबेड़ा करने ते जायजा लैने लेई एह बैठक लाई गई। नुमायंदे मुख्य सचिव होरें गी घाटे च चला करदी इकाइए गी मुनाफाबख्शा बनाने ते नकारा पेदे इदारें गी नमें सिरेया कम्म करने योग बनाने लेई नीति आनने, मंडिएं च किसान घर बनाने, गोदाम दी सहूलत, जीएसटी च छूट देने, लौहके, भलेया लौहके ते दरमेयाने दर्जे दे उद्योगें गी पैहल देने, एक्पो मार्ट कायम करने, औद्योगिक क्षेत्रें च बुनियादी ढांचे च सुधार करने समेत मुद्दे ते मंगें बारे जानकारी दित्ती। मुख्य सचिव होरें नुमायंदे गी सुनने मगरा भरोसा दित्ता जे उंदे जायज मसलें दा समें बद्ध ढंगै सिर नबेड़ा कीता जाग।



DC Reasi

रियासी दे डिप्टी कमीशनर विशेष महाजन होरें जेहड़े श्री शिव खोड़ी श्राईन बोर्ड दे उप-अध्यक्ष बी हैन, होरें शिव खोड़ी रनसू थाहर श्रावन महोत्सव दा उद्घाटन कीता। इस दरान कांवड़ यात्रा दा बी सरिस्ता कीता गेआ। उद्घाटनी समारोह दरान बोलदे होई डिप्टी कमीशनर होरें आखेआ जे श्रावन महोत्सव दरान केई सारी धार्मिक गतिविधिएं दा सरिस्ता कीता जाग। उनें हैलीपेड ते श्राईन लेई वैकल्पिक रस्ते दी मंजूरी देने लेई उपराज्यपाल हुंदा धन्नबाद कीता।



Amarnath Yatra-Jammu

जम्मू दे भगवती नगर आले आधार शिविर थमां 2 जहार 484 श्रद्धालुएं दा इक होर जत्था श्री अमरनाथ जी दी यात्रा लेई रवाना होआ। एह यात्री 91 गड्डिएं दे काफले च सुआर होइयै अगड़ी यात्रा लेई रवाना होए। इंदे च 770 बालटाल लेई ते 1 जहार 714 पहलगाम लेई रवाना होए। अजें तगर 4 लक्ख थमां बद्ध श्रद्धालु श्री

अमरनाथ जी दी गुफा च मत्था टेकी चुके दे न। 52 दिनें तगर चलने आली एह यात्रा 19 अगस्त गी रक्खड़ पुन्नेआ आले दिन सम्पन्न होई जाग।



Ramban-Amarnath Yatra

श्री अमरनाथ जी दी यात्रा जेहड़ी ऐल्ले रामबन जिले थमां रमानदारी कन्नै चला करदी ऐ। यात्रुएं गी बेहतर रूट्टी-पानी ते साफ सफाई दी सहूलत देने लेई प्रशासन आस्सेआ लंगरें दी स्थिति दी लगातार निगरानी रखी जा करदी ऐ। रामबन दे डिप्टी कमीशनर बसीर उल हक चौधरी होर समें सिर पर यात्री निवास चन्द्रकोट दा दौरा ला करदे न तां जे श्रद्धालु बगैर अड़चन दे यात्रा करी सकन ते लोड़चदी चीजें दी दस्तेयाबी गी जकीनी बनाया जाई सकै। सुरखा अजेंसिएं कन्ने नेड़मा तालमेल बनाया जाई सकै।



Infiltration Bid

फौज नै जम्मू कश्मीर दे बट्टल सेक्टर च घुसपैठ दी इक कोशश गी नाकाम करी दित्ता ऐ। आतंकवादिएं कन्नै होए दे टाकरे च फौज दा इक जवान जख्मी होई गोआ ऐ। ऐल्लै कारवाई चला करदी ऐ। होर ब्यौरे गी बलगेआ जा करदा ऐ।



Secretary Health

सेहत ते मैडिकल शिक्षा सरबंधी सचिव डॉ. सईद आबिद रशीद शाह होरें कल जम्मू कश्मीर च डेंगू दे नियंत्रण दी तैआरिएं दा जायजा लैने लेई लग्गी दी इक बैठक दी अध्यक्षता कीती। सचिव होरें बमारी दे बेहतर प्रबंधन राएं इस खतरे कन्नै निबड़ने लेई सब्बने मुत्तलका धड़ेंग ी किट्ठे जतन करने पर जोर दित्ता। उनें कूड़ा किट्ठा करने आली वेनें ते जम्मू मुनिसिपल कारपोरेशन दे होडिंगस, मकामी रेडिया ते टैलीविजन राएं समुदाय गी जागरूक करने लेई तेज अभियान चलाने दा आह्वान कीता। उनें एह बी जानकारी दित्ती जे डेंगू फैलने दरान असरदार निगरानी ते लोकें कन्नै सांर कायम करने लेई राष्ट्रीय सेहत मिशन जम्मू कश्मीर दी 104 हेल्थ हैल्पलाइन दा इस्तेमाल कीता जाग।



Old Pension Scheme

सरकार नै कल आखेआ ऐ जे केन्द्र सरकार दे मुलाजमें दी परानी पेंशन योजना गी ब्हाल करले दे कुसै बी प्रस्ताह पर बचार नेई कीता जा करदा ऐ। बजट इजलास दे कल पैहले ध्याड़े लोकसभा च कांग्रेस दी सांसद प्रणीती सुशील कुमार शिंदे हुंदे आस्सेआ पुच्छे गेदे इक सुआलै दा परता दिंदे होई खजाना राज्यमंत्री पंकज चौधरी होरें आखेआ जे प्रधानमंत्री श्रम योगी मानधन पेंशन स्कीम 60 ब'रे मगरा 3 ज्हार रपे दी म्हीने दी पेंशन कन्नै बुर्जुग अवस्था च सुरक्षा प्रधान करने लेई 2019 च शुरू कीती गई ही। उनें आखेआ जे 18 कोला लेइयै 40 ब'रें दी बरेसू तोड़ी दे ओह कम्मगार, जिंदी म्हीने दी आमदन 15 ज्हार जां ओहदे कोला घट्ट ऐ जां जेहड़े कर्मचारी भविष्य नीधि, मुलाजम राज्य बीमा निगम ते राष्ट्रीय पेंशन योजना दे मिंबर नेई हैं। ओह इस योजना च शामिल होई सकदे न।

<><><><><><>